

## CRÜ

GRAM, CUME L'AQUA DAL MAR  
STEGN ME UN TOC DA LEGN O UN FER DA PRA'  
GIACHETA AL DI' DA LA FESTA  
FLANELA E PE' LUSTAR  
CA SA USAN PU'

GNUCC, CALDARINA E PAN GIALT  
CIUCC FEM DANA' DENTR'IN DI BAR  
MAISTAR SE AL FIOCA O AL TEMPESTA  
VISTI' DA LA FESTA  
TA LAURUM PU'

I OCC CA PARLA, SENZA VEC LA PAROLA  
I FIOU D'ESTA' A LAURA' QUANT GA FINIS LA SCOLA  
E PULVARA, DA SAC DA CIMENT  
STRAC, MA CUN LA VOIA DA VES CUNTENT  
I OCC CHE BRILAN, RUGIA' DA MATINA  
AL SO' RITRATT SUL COMO' TACA' A LA MARIA BAMBINA  
E FADIGA ..... TANTA FADIGA  
LAURA' E FADIGA PAR LA LOA E LA SPIGA

MA NUM SEM CRU', CRU'  
BEI ME NUM NA NASAN PU'  
SE ROTT LA MACHINETA  
FA SVELT CHE DUMAN SEM CHI PU'  
MA NUM SEM CRU', CRU',  
AL ME MUNT L'ESISTA PU'  
GIO' UN'ALTRA BIRETA  
PAR MI DUMAN LE' UN AN DA PU'

LA NABIRA, CA LA VEGNA GIO' DAL NAS  
SCARP DA CURAM PAR CUR IN MES DI PRA'  
CULSON FIN SURA AL GINOCC  
A NUEMBAR AL FA FRECC  
FA SVEL ANDA' A CA'

CAVEI CORT PAR CIAPA' NO I PIOCC  
I OCC BARLOGIAN PUSE' GRAND CHE 'L TO BOCC  
A FA FESTA AL DI' DAL PARDON  
CARAMEI E BUN BON  
FINCHE' TAN PO PU'

MAN SIGNA', DA FOLCIA E BAIRA  
AL CRUCIFISS DA LEGN SUL FALSASTIPIT IN CUSINA  
FRECC .... BARBELA' DAL FRECC  
AL TACA IN DI OSS  
FA SVELT ANDA' IN LECC  
MAN GIRA', VEGNA GIO' LA SCIGHERA  
LA SA TAIA CUL CULTELL  
I FIOU CA GIUGA IN SU LA GERA  
TASE' ... PARLA' NO E TASE'  
L'UDUR DI MUCC BAGNA'  
E LA PALTA SOTA I PE'

MA NUM SEM CRU', CRU'  
BEI ME NUM NA NASAN PU'  
SE ROTT LA MACHINETA  
FA SVELT CHE DUMAN SEM CHI PU'  
MA NUM SEM CRU', CRU',  
AL ME MUNT L'ESISTA PU'  
GIO' UN'ALTRA BIRETA  
PAR MI DUMAN LE' UN AN DA PU'